



# Da baselgias tier tempels e moscheas

La Cuminonza da lavur interreligiusa en Svizra a Mustér e Glion



«Dialogue en route» a Glion. Rino Caduff muossa la tabla culla damonda provoconta. Il president communal Aurelio Casanova porta igl emblem «D» ch'animescha al dialog. FOTO A. BEELI

■ (anr/abc) Sin siu viadi cul velo tras la Val dil Rein, Svizra orientala e Turitg ein ils giuvens activists dalla Cuminonza da lavur interreligiusa en Svizra (Iras-Cotis) sefermai a Glion. L'organisasiun inaugurescha quest'jamna las diversas staziuns cun puschidas che promovon il dialog. Aschia a Mustér e Glion. 20 giuvens da tuttas regiuns dalla Svizra separticipeschan alla campagna d'ina jamna. Finamira eis ei da presentar alla publicitad ina nova puschida cun 21 staziuns respectiv loghens d'alloschi. Ei setracta da loghens nua ch'igl ei pusseivel da scuvierer la varietad religiusa dalla Svizra. Gia dagitg vivan buca pli mo catolics e reformai en nosa tiara. Ils Gedi

ein cheu da casa dapi il temps medieval. Oz dat ei aunc autras cuminonzas. La finamira dalla campagna eis ei d'emprender d'enconuscher quellas tuttas, da promover il dialog sco era da far frunt e sminuir pregiudezis.

## Sminuir pregiudezis

Dumengia han 10 participonts entschiet sil Pass Alpsu l'emprema etappa dalla campagna. Per la Cuminonza da lavur interreligiusa en Svizra (Iras-Cotis) cun sedia a Turitg eis ei la tiarza petga da sias finamiras. Sper organisar mintg'onn il november l'jamna dallas religiuns ell'entira Svizra, ed edir il calender interreligiun dils firaus, duei la

campagna «Dialogue en route» porscher la pussevkladad directa d'ir sin viadi. Ella Svizra orientala e Turitg separticipeschan 21 staziuns alla campagna. Dapertut leu san ils giuvens emprennder d'enconuscher la religiun specifica ch'ei leu da casa.

Dumengia ha fra *Martin Hieronymus* dalla claustra da Mustér beneventau ed accumpignau els dall'Alpsu tochen giu Mustér. El pli vegl convent el nord dallas Alps han els tschenau, han giu caschun d'emprender d'enconuscher igl avat, ils conventuals e lur regla benedictina. Leu han ils giuvens giu gl'empremdialog interreligiun. A Mustér han els surdau igl emblem dalla campagna nova. Ei setrac-



ta d'in bustab grond «D» da metal che envida d'entrar en dialog. Cun guides locals emprendan ils viandonts lu d'enconuscher ils connex culla religiun resp. confessiun da quei liug.

Ed ier ein ils giuvenils arrivai a Glion. Leu ha *Rino Caduff*, president dalla societad Anna Catrina SA, beneventau els el marcau vegl. Ella cuort dil Museum Regional Surselva ha el exprimiu siu placher che la cuminonza Iras-Cotis endrezza era a Glion ina dallas 21 staziuns. *Annina Schlatter* e *Gian Rudin*, dus menaders dalla campagna, han surdau ad el ed a Rino Caduff la tabla culla damonda provoconta «Drova ei religiun?» ed igl emblem «D» sco a Mustér.

#### Dalla catedrala ella moschea

La campagna «Dialogue en route» entscheiva en tuttas regiuns svizras. Sil viadi tras la Val dil Rein tochen Sogn Gagl, Kreuzlingen, Schaffusa e Turitg dat ei numerusas caschuns d'entrar en dialog interreligiun. A Glion ha quei evidentamein connex culla Reformaziun grischuna e culla claustra dallas soras dominicanas. Il president communal dad Ilanz/Glion, *Aurelio Casanova*, ha rendiu attent al dialog che ha liug a Glion dapi 500 onns. A Glion vivan buca mo catolics e reformai, cheu dat ei era ina baselgia libra evangelica ed ina baselgia neoapostolica. Oz arriva la gruppa da viadi dad Iras-Cotis a Cuera. Vinavon pedallan els dil Rein giu tochen ad Altstätten nua ch'els visetan l'uniun culturala serba. A Sogn Gagl dat ei ina guidada tier la cuminonza locala islama ed ella catedrala. Alla fin dall'jamna fa la gruppa staziun ad Opfikon/Turitg el tempel da Shiva dils Singales.

**Ulteriuras informaziuns tier quella campagna mira era sut: [www.iras-cotis.ch](http://www.iras-cotis.ch)**